

DOMENIE XIII «VIE PAL AN»

Antifone di jentrade Sal 46,2

Batêt lis mans, popui de tiere,
scriulant al Signôr in ligrie.

Colete

Diu, che midiant de tô gracie
tu âs volût che o diventassin fîs de lûs,
danus par plasê di no jessi invuluçâts dal scûr de falsetât
ma di restâ simpri lusorôs cul sflandôr de veretât.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE 2 Re 4,8-11.14-16

Chel chi al è un om di Diu, un sant; che al resti culi.

Dal secont libri dai Rês

Une dì che Liseu al passave par Sunem, une femine di cjase grande che e jere a stâ aventi, lu invidà a gustâ. Daspò, ogni volte che al passave, al leve li di jê par mangjâ. Jê i disè al so om: «Cjale: o soi sigure chechel om che al passe simpri par cjase nestre al è un sant, un om di Diu. Parcè no i fasino une cjamarute adalt, di mûr, e i metin un jet, une taule, une sente e un lampion? Cuant che al passarà par chi di nô, al podarà ritiràsi là sù». Une dì che al capità ali, si ritirà te cjamare adalt e si distirà sul jet. I disè al so famei Ghecazi: «Clamimi cheste buine Sunamite». Le clamà e jê si presentà denant di lui. Liseu al continuà: «Disii: Tu ti sês tant disturbade par nô. Ce si puèdial fâ par te? Ise une peraule di dî par te al re o al soestant dai soldâts?». Ma jê i rispuindè: «Jo o stoi cul gno popul». Al zontà: «Alore, ce si puèdial fâ par jê?». Ghecazi al rispuindè: «Poben jê no à fruts e il so om al è in là cui agns». Dissal Liseu: «Clamile». Il famei le clamà e jê si fermà su la puarte. I disè: «L'an che al ven, come cumò, tu braçolarâs un fi».

Peraule di Diu.

SALM RESPONSORIÂL dal Salm 88

R. O cjantarai il to boncûr cence polse.

O vuei cjantâ il to boncûr, Signôr, cence polse,
di ete in ete cu la mê bocje
o contarai trop che tu sês di peraule.

Parcè che tu âs dite: «Il gno boncûr al è par simpri,
la mê fedeltât e je salde come il zîr des stelis». **R.**

Furtunât il popul che al è bon di laudâti,
che al va indenant, Signôr, cul sflandôr de tô muse.
Tal to non dut il dì al è in gjonde,
te tô justizie al cjate la sô glorie. **R.**

Parcè che tu sês tu la fuarce che nus fâs vinci
e tal to boncûr il nestri cjâf tu alcis.
Al è propit il Signôr il nestri scût,
e il Sant di Israel re nestri. **R.**

SECONDE LETURE Rm 6,3-4.8-11

O sin stâts sepulîts cun Crist in fuarce dal batisim par unîsi a la sô muart, cussì ancje nô o vin un mût di vivi gnûf crei.

De letare di san Pauli apuestul ai Romans

Fradis, ducj nô, che o sin stâts batiâts in Crist Jesù, o sin stâts batiâts par unîsi a la sô muart. O sin duncje stâts sepulîts cun lui in fuarce dal batisim par unîsi a la sô muart, cul fin che, come che Crist al è resurît dai muarts midiant de glorie dal Pari, cussì ancje nô o vin un mût di vivi gnûf crei. Se po o sin muarts cun Crist, o crodìn che cun lui ancje o vivarìn, savint che Crist, resurît dai muarts, nol mûr plui e la muart no varà plui nissune paronance sun lui. Par chel che al rivuarde di fat la sô muart, lui al è muart al pecjât une volte par dutis; par chel che al rivuarde inveceit la sô vite, lui al vîf par Diu. Cussì ancje vualtris consideraitsi muarts par simpri al pecjât ma vîfs par Diu in union cun Jesù Crist.
Peraule di Diu.

CJANT AL VANZELI 1 P 2,9

R. Aleluia, aleluia.

Vualtris o sês la gjernazie sielte, i predis e i rês, la int sante;
contait lis grandis voris di Diu, che us à clamâts
dal scûr a la sô lûs sflandorose.

R. Aleluia.

VANZELI Mt 10,37-42

Chel che nol cjape sù la sô crôs daûr di me, nol è degn di me. Chel che us acete vualtris, mi acete me.

Dal vanzeli seont Matieu

In chê volte, Jesù al disè ai siei dissepui: «Chel che i vûl ben al pari o a la mari plui che no a mi, nol è degn di me; chel che i vûl ben al fi o a la fie plui che no a mi, nol è degn di me. Chel che nol cjape sù la sô crôs daûr di me, nol è degn di me. Chel che al varà cjatade la sô vite, le pierdarà; e chel che al varà pierdude la sô vite par colpe mê, al tornarà a cjatâle.

Chel che us acete vualtris mi acete me e chel che mi acete me al acete chel che mi à mandât.

Chel che al acete un profete par vie che al è profete, al varà la ricompense di un profete. Chel che al acete un just par vie che al è just, al varà la ricompense di un just. Chel che i varà dade magari dome une tace di aghe frescje a un di chescj piçui, par vie che al è gno dissepul, us al dîs in veretât: nol pierdarà la sô ricompense».

Peraule dal Signôr.

Su lis ufiertis

Diu, che tu operis cun fuarce intai tiei misteris,
fâs, par plasê,
che la nestre devozion e sedi simpri degne dai tiei sants regâi.
Par Crist nestri Signôr.

Antifone a la comunion Sal 102,1

Benedis, anime mê, il Signôr:
dut ce che al è in me il so non sant al benedissi.

O ben: cf. Zn 17,20-21

Pari, ti prei par lôr, par che a sedin ancje lôr un in nô,
di mût che il mont al cognossi che tu tu mi âs mandât,
al dîs il Signôr.

Daspò de comunion

Cheste vitime divine ufierte e ricevude
che nus fasi vivi, Signôr,
par che, saldâts daprûf di te cuntun amôr che nol cognòs polse,
o podedin produci un ben che al dure par simpri.

Par Crist nestri Signôr.